

Na osnovu člana 28. Zakona o principima lokalne samouprave u FBiH ("Sl.novine FBiH", br.49/06) i člana 86. stava 4. Statuta Općine Ilijaš – prečišćeni tekst ("Sl.novine Kantona Sarajevo", br.20/09) Općinsko vijeće Ilijaš na __ sjednici održanoj dana __ februara 2014.godine, donijelo je

**ODLUKU
O USLOVIMA, NAČINU KANDIDIRANJA , ODRŽAVANJA IZBORA I DODJELI
MANDATA
U MJESNIM ZAJEDNICAMA**

Osnovne odredbe

Član 1.

Ovom Odlukom uređuje se izbor članova Savjeta mjesnih zajednica, te utvrđuju načela koja važe za izbore u mjesnim zajednicama na području Općine Ilijaš.

Član 2.

Sredstva za provođenje izbora u mjesnim zajednicama osigurat će se u Budžetu Općine Ilijaš.

Član 3.

Izbor članova Savjeta mjesnih zajednica obavlja se na osnovi općeg i jednakog biračkog prava neposrednim i tajnim glasanjem.

Član 4.

Svaki građanin mjesne zajednice s navršениh 18 (osamnaest) godina života koji je upisan u Izvod biračkog spiska za područja koja pripadaju jednoj mjesnoj zajednici ima pravo da bira i da bude biran.

Organi za provedbu izbora

Član 5.

Organi za provedbu izbora su Komisija za poslove mjesnih zajednica i saradnju sa drugim općinama i gradovima Općinskog vijeća Ilijaš (u daljem tekstu: Komisija) i birački odbori.

Članovi organa za provedbu izbora su osobe sa pravom glasa koje su upisane u Izvod iz biračkog spiska sa područja mjesne zajednice.

Komisija imenuje članove biračkih odbora na osnovu prijedloga Savjeta mjesnih zajednica, najkasnije 15 dana prije dana određenog za održavanje izbora.

Član 6.

Birački odbori sastoje se od predsjednika i dva člana koji imaju svoje zamjenike.

Član 7.

Komisija će utvrditi nadležnost biračkih odbora u skladu sa ovom Odlukom.

Kandidiranje za izbore i ovjera kandidata

Član 8.

Da bi učestvovali na izborima za članove Savjeta mjesne zajednice kandidati se ovjeravaju kod Komisije iz člana 5. ove Odluke.

Član 9.

Da bi se ovjerio za izbore u mjesnim zajednicama kandidat mora ispunjavati slijedeće uslove:

1. da je upisan u Izvod iz biračkog spiska unutar granica mjesne zajednice;
2. da je predložen od zbora građana mjesne zajednice ili zbora građana podružnice ili grupe građana mjesne zajednice koju čine najmanje 15 građana sa potpisima ili da je prikupio 15 potpisa građana mjesne zajednice kao nezavisni kandidat, u skladu sa članom 4. ove Odluke.

Osobe iz tačke 2. stava 1. ovog člana dužne su podnijeti kandidatske prijave najkasnije 15 dana prije dana određenog za održavanje izbora, na obrascu koji propiše Komisija.

Član 10.

Općinska služba nadležna za poslove sa mjesnim zajednicama u saradnji sa organima mjesne zajednice treba poduzeti aktivnosti tako da se osigura broj kandidata najmanje koliko savjet broji članova.

Provedba izbora i dodjela mandata

Član 11.

Glasanje se provodi na biračkim mjestima koje odredi Komisija.

Komisija najkasnije 10 dana prije dana izbora, objavljuje koja su biračka mjesta određena za glasanje i gdje se može glasati.

Član 12.

Dan uoči izbora Komisija dostavlja biračkim odborima birački materijal koji uključuje odgovarajući broj glasačkih listića, glasačkih kutija i izvod iz biračkog spiska.

Član 13.

Datum održavanja izbora utvrđuje se posebnom odlukom u skladu sa Statutom općine.

Glasanje traje neprekidno u toku dana, sa početkom u 07,00 do 19,00 sati.

Član 14.

Članovi biračkih odbora dužni su objasniti biraču način glasanja i osigurati tajnost glasanja.

Član 15.

Član biračkog odbora dužan je izvršiti identitet birača na osnovu važeće lične isprave.

Član 16.

Komisija će utvrditi izgled glasačkog listića za izbore u mjesenim zajednicama.

Glasački listić omogućava biraču da glasa za kandidate za članove savjeta mjesne zajednice najviše do broja članova savjeta mjesne zajednice.

Član 17.

Glasački listić sadrži datum izbora, naziv savjeta mjesne zajednice, kandidate poredane po abecednom redu po osnovu prezimena i uputstvo o načinu korištenja i ispunjavanja glasačkog listića.

Član 18.

Komisija dodjeljuje mandat u skladu sa članom 88. Statuta Općine Ilijaš. Nespojiva je funkcija predsjednika savjeta mjesne zajednice i vijećnika Općinskog vijeća Ilijaš. Kandidat koji je vijećnik Općinskog vijeća ukoliko bude izabran za predsjednika savjeta mjesne zajednice u roku od 3 (tri) dana treba podnijeti ostavku na jednu od funkcija. Ukoliko podnese ostavku na funkciju predsjednika savjeta mjesne zajednice ta funkcija će biti dodijeljena narednom kandidatu sa najvećim brojem glasova,

U slučaju jednakog broja glasova za člana savjeta ili predsjednika savjeta mandat će se dodijeliti žrijebanjem koje provodi Komisija.

Prelazne i završne odredbe

Član 19.

Implementaciju izbornih rezultata nakon dodjele mandata u skladu sa članom 18. ove Odluke i tokom trajanja mandata vršit će komisija nadležna za poslove sa mjesnim zajednicama.

Član 20.

Stupanjem na snagu ove Odluke prestaje da važi Odluka o uslovima, načinu kandidiranja i održavanja izbora u mjesnim zajednicama Općinskog vijeća Ilijaš broj: 01/1-02-288-4/10 od 02.03.2010. godine

Član 20.

Ova Odluka stupa na snagu danom objavljivanja u "Službenim novinama Kantona Sarajevo".

Broj: 01/1-02- _____/14
Ilijaš, _____ 2014.godine

PREDSJEDAVAJUĆI OV-a
Damir Filipović, s.r.

OBRAZLOŽENJE

Odlukom o provođenju izbora u mjesnim zajednicama predloženo je da se neposredni izbori u mjesnim zajednicama održe 12. (subota) aprila 2014. godine.

Ovom Odlukom predlažu se uslovi, način kandidiranja, održavanja izbora i dodjela mandata u mjesnim zajednicama. U članu 18. Odluke predložena je nespojivost funkcije općinskog vijećnika i predsjednika savjeta mjesne zajednice kao posljedica dosadašnjih iskustava u radu savjeta mjesnih zajednica.

Finansijska sredstva za realizaciju ove odluke predviđena su u budžetu općine Ilijaš za 2014. godinu.